

葉恭綽 編

全清詞鈔

中
冊

中
華
書
局

葉恭綽編

全清詞鈔

中冊

中華書局

全清詞鈔第十三卷

張 誠

字希和，一字熙河，晚號嬰上散人，浙江平湖人，乾隆四十二年舉人，候選知縣，有鶴舫詞一卷，一名嬰

山小國晚年手定詞。

鳳凰臺上憶吹簫 渡揚子江

浮玉千年。投金瞥响。大江一葉扁舟。想海門東下。萬里洪流。多少帆檣翼翼。無非是、明月蜉蝣。何人識。臨風把酒。慷慨悲秋。悠悠。今來古往。蕭寺數聲鐘。六代浮漚。看妙高臺畔。海嶽瓊樓。玉帶山門依舊。斜日下、燈火瓜洲。移情處。江湖滿地。笑指閒鷗。

黃定文

字仲友，號東井，浙江鄞縣人，乾隆四十二年舉人，官江蘇松江府知府。

江城子 重到峽山

六年此地看花時。醉題詩。踏嶽崎。湖海飄蓬。曾與夢相依。前度劉郎今又到。嗟老矣。鬢成絲。江梅吹盡

柳綿飛。雨淒迷。畫船移。不盡青山。依舊帶寒谿。往事如烟無處問。雲外月。也應知。

楊芳燦

字蓉裳、一字香叔、江蘇金匱人、乾隆四十二年拔貢、官戶部員外郎、有真率齋詞二卷、芙蓉山館詞四

卷、又輯其親友之作爲荆園唱和集、

清平樂 泛舟

鏡奩眉嫵。湖水清如許。蘭葉輕風槐葉雨。好箇秋光無主。興闌欲泛歸橈。隔溪漁子相招。一帶藕華深處。夕陽人影紅橋。

菩薩蠻

無情燕嘴銜花去。多情蛛網黏花住。去住總銷魂。紅巾凝淚痕。水晶簾押靜。寒浸春人影。新恨壓眉頭。嬌波橫不流。

甘州

題張子白邊城插柳圖

拍金笳。別譜柳枝歌。攪入角聲多。渺荒寒一片。夕陽影裏。搖兀明駝。記否藏烏亭榭。春水碧於羅。更層陰駐馬。舊夢蹉跎。惆悵風姿如許。恁孤根無分。移傍靈和。認塞煙沙雨。此地我曾過。向離亭。送君西去。折長條。宛轉奈愁何。人空老。漢南回首。此樹婆娑。

袁通

字達夫，號蘭邨，浙江錢塘人。官河南汝陽縣知縣，有柳雪詞，伴雲詞各二卷，春影詞，泥憶雲室詞，無定雲庵詞，通璐泛舟詞各一卷，總名捧月樓詞八卷，又有燕市聯吟集四卷。

清平樂

月下憶家

帶寬移孔。愁是新來種。坐到滿城鐘欲動。衣薄不禁寒重。前宵月子彎彎。今宵月子團圓。想遍故園高閣。涼生何處闌干。

虞美人

單家橋小憩，見杏花一枝，紅亞牆缺。

誰家繁杏開如許。倦眼頻驚顧。幾番欲折又逡巡。要向天涯多賸幾枝春。凝顰似笑紅千片。嬌映朝霞情。相看那得不思家。又負鳳凰臺畔一邨花。

馮敏昌

字伯求，號魚山，廣東欽州人。乾隆四十三年進士，改庶吉士，授翰林院編修，官刑部主事，有小羅浮草

堂集

天仙子

新構小亭落成

結就小亭形似舸。泉石周遭叢竹裹。漁歌斷處接樵歌。斜日墮。浮雲破。對影三人風月我。老去心情耽懶惰。怕向危流重振柁。竭來宴憩意悠然。閒吟坐。饒清課。讀盡絃詩無不可。

李鼎元

字和叔，號墨莊，又號味堂，四川綿州人。乾隆四十三年進士，改庶吉士，授翰林院檢討，官兵部員外郎。

金縷曲 闌干

宛轉情何極。襯花陰、春藏幾許。蝶蜂曾識。曲梁玲瓏呈幻影。低護青青草色。正睡起、海棠無力。偏共柔腸爭九轉。便陽烏、午影扶難直。桃源路、一灣隔。鈴謁鶴步還愁入。算惟有、槐邊蟻度。柳邊鶯織。月夜縱橫添斷竹。羽客憑虛弄笛。早絆住、花間游屐。酒點茶痕人去後。更誰憐、粉唾黏塵跡。留淺蔭、蘸苔碧。

楊

掄

字方叔，號蓮跂，江蘇金匱人。乾隆四十三年進士，官浙江天台縣知縣，有春草軒詞。

浣溪紗

路轉峰迴石徑斜。小橋流水那人家。滿身香霧點松花。柳弱正眠蠶正起。笳尖初出韭初芽。離愁如絮繞天涯。

摸魚兒 花魂

最關心、數花風過。落紅陣陣如雨。叢鈴尙解零星語。爲甚暗添酸楚。春欲去。賸一點靈犀、蕩漾鴛鴦浦。尋芳早誤。趁淡月籠煙。輕雲蘸水。好認再來路。千般慮。茵溷何從自主。曇華終仗超度。粉魔香劫尋常事。埋恨幾堆黃土。須省悟。便胡蝶灰飛。未算長生庫。騷經漫注。縱翦紙能招。懸旛待引。有夢枉凝竚。

齊天樂 眼鏡

眼前便是光明藏。依然那時年少。有影雙圓。無花並蒂。閣住鬢絲輕巧。纖翳作平淨掃。怪隔一層雲。轉增分曉。幸未深深。比量依約近寅卯。當年曾見古道。靜觀還自得。和月幽抱。青白徒翻。妍媸莫辨。短處偏逢嘲笑。今番了了。恍世界琉璃。頓消煩惱。能識連環。鏡中人更好。

韋佩金

字書城、號西山、江蘇江都人、乾隆四十三年進士、官廣西馬平縣知縣、有夜雨珠簾詞二卷、

青玉案 魚山

略無樹色排人面。祇碎石、如花片。漢魏茫茫碑版亂。王侯剩骨。才人浩劫。山老春難算。迎神一曲陳華宴。風雨聲吹洞簫散。不是山空仙路斷。遲遲車馬。生生裙襖。可惜無人見。

買陂塘 回中山在涇州城西二里

距山城、嵯峨當面。隆隆突起如如許。左清右濁相交匯。冰味須分甜苦。牢記取。此地是、扶風安定初分處。雍涼門戶。嗟輕棄關中。不規隴上。作事幾人誤。回中曲。一自流傳樂府。地靈擅絕千古。花開穆滿筵虛薦。有恨金刀代補。桃核吐。不歸葬仙山。留種人間土。天西老嫗。聽青鳥飛鳴。兩三聲裏。撇卻漢皇去。

王元勳

字叔華、原字秀峯、江蘇嘉定人、乾隆四十三年進士、官徐州府教授、有樵玉山房詞、幻花別集、涉江詞

各一卷、

梧桐影

露葉明。風檐靜。殘月五更人倚樓。開窗猶望秋河影。

倪象占

原名承夫，字九三，二字韭山，浙江象山人，乾隆四十三年優貢，官嘉善縣訓導，有青樞館詞稿初鈔一

卷，一名未免有情集。

惜分飛

仕女立軸

好夢雙雙金粉炫。舉翅晴空忽見。惹箇人忘倦。相憐忍肯加團扇。豈是衣香深戀戀。翠後珠前繞遍。一笑東風面。多應悞認桃花片。

百字令

舟晚邳州

柁樓飯罷。悵飛帆不似莊周胡蝶。七十長亭何處是。挽上重重浦牖。麥翠斜畦。蘆蒼矮屋。烟老垂楊合。棲鴉無數。一時歸翅相接。爲念帶水西來。東流去也。有當年英傑。黃石祠空涼照外。苦算幾杆殘弈。月轉澄霄。星垂曠野。小泊都如葉。中原何處。跨驢前夢閒踏。

生查子

秋江歸棹卷，爲張秋輝作。

昔日綠楊絲。今日黃蘆絮。日暮過橫塘。夜泊知何處。新月喜逢秋。殘月愁當曙。月下有鴛鴦。兩兩分飛去。時秋輝得斷弦信。

吳中奇

字瘦夫、江蘇吳江人、

百字令

顧菴厓探梅鄧尉、賦詞索和、次韻奉酬、

霜風如翦。看裁成鄧尉、梅花千樹。斷澗流澌疏照影。宛似凌波微步。山店雲封。茶寮雪霽。屋角青旗露。茫茫香海。渾疑山盡無路。最是騷客騎驢。奚奴挈榼。獨然吟鬚去。看到寒深呼半臂。不覺花光將暮。妙思紛來。與梅俱化。豈減何郎句。新詞重按。幾番玉笛低度。

仇鳳梧

字世臣、號桐崗、江蘇元和人、

暗香

梅魂

夜涼月白。在水濱竹外。通些消息。萬籟寂然。縞袂依稀稀渡江驛。約略窗邊乍到。但飛繞、枝南枝北。待與訴、何遜當年。尋去又無跡。疇昔。夢堪憶。記素服麗人。恁般標格。是空是色。將近仍離渺難卽。應是逋仙逝後。還想返、故山墳側。怕玉笛、吹斷也。欲招未得。

高桐

字雪舫、浙江秀水人、

綺羅香

落葉

秋落梧桐。煙寒橘柚。野色蕭蕭如許。捲起西風。繚亂漫天飛舞。才點向、紅板溪橋。又吹還、綠蘿庭戶。最難描、一片淒涼。酒醒昨夜打窗處。飄零愁煞倦旅。南北東西萬里。有誰留汝。古道斜陽。自去自來無緒。供野竈、閒煮茶香。載寒蛩、輕隨波去。記樓頭、新綠濃時。隔江聽杜宇。

雷

曉

字蕙樓、江蘇華亭人、諸生、有蘭圃詩餘、

齊天樂 湘秋閣坐月

鶴汀鳬渚秋如水。簾櫳玉鉤風定。蘭露搖珠。桂香糝雪。作就今宵淒冷。白蓮花柄。看乍出龍宮。團圓端正。幻境真成。一奩萍藻鏡中映。盈盈銀漢宛在。鵲橋何處是。空見星影。天上霓裳。人間珠髻。一樣梳妝工整。更深宵靜。甚拍徧闌干。更無人應。鐘動鄰庵。酒醒還自省。

顧亮

字幔亭、江蘇無錫人、乾隆四十四年舉人、官山陽縣教諭、有焚餘詩稿、附詞、

菩薩蠻

蘭屏半掩疏簾月。雲鬢斜鞦香飄雪。尊酒祝花前。花開勝舊年。陌頭芳草碧。別後離懷結。數盡北歸鴻。春波煙萬重。

汪如洋

字潤民，號雲壑，浙江秀水人。乾隆四十五年進士及第，授翰林院修撰，有葆冲書屋詩餘一卷。

揚州慢

詠芍藥，用樊榭山房韻。

門掩梨雲。徑吹飄雪。輕寒九十都銷。對鶯忙蝶懶，強與殿芳韶。想侵曉、豐臺露泣，箇人珠淚，染徧蛟綃。怕仙郎薇省，吟成也只無聊。春嬉南浦，記盈盈、兒女情苗。嘆后土祠前，歐公堂外，水遠山迢。贏得膽瓶斜插，銀燈畔、酒量偷描。任濃斟藍尾，來朝綠暗平橋。

吳蔚光

字愬甫，一字執虛，號竹橋，江蘇昭文人。乾隆四十五年進士，改庶吉士，官禮部主事，有執虛詞鈔一卷。

小湖田樂府前集十卷、續集四卷、詩餘辨僞二卷、姜張詞約二卷、

滿庭芳

永晝如年。遙天似夢。旅懷可是萋迷。湘簾軸處，飛燕一雙低。幾許蜂狂蝶浪，花鈴底、得意爭棲。營巢苦。杏林雨歇，何處重銜泥。好春容易謝，蘭篝徒試，蕉紙虛題。已雕闌凭煖，日未斜西。暗憶故鄉消夏，真瀟灑、竹町荷谿。長安樂，不如歸去，休待杜鵑啼。

憶少年

入丁觀音閣巷進而南，野水平田，荒烟衰草，滿目淒涼。鮑叔冶云：是當時舊院左近也。

衰楊幾縷，敗池幾眼。荒隄幾段。淒清小風景，是舊時門院。無復板橋橋上板。儘銷沈、香溫玉豔。夕陽芳

草裏更何人腸斷。

喝火令 十一月十五夜對月

畫閣層層上。雕闌曲曲連。也無雲片也無烟。只有匣中鸞鏡。挂在碧羅天。香篆心同結。茶膏手自煎。蓮花漏緊且無眠。笑說今宵。明月十分圓。笑說今年明月。猶有一回圓。此詞爲魚門前輩所酷賞。戊戌南歸。送行詩云。樓頭寒月開圓鏡。注。君有對月詞最工。指此也。

錢塘

字禹美。原字鶴原。號虹舫。又號澹亭。江蘇嘉定人。乾隆四十五年進士。官江寧府教授。有玉葉詞。響山

閣詞各一卷。

燭影搖紅

遲日園林。一鳩啼落桃花片。冷吟殘醉病懨懨。未覺春衫健。芳意晴光池館。小闌干。青枝蔭遍。玉爐香冷。金粉屏深。晝長誰見。騎馬斜橋。舊遊曾共珠簾捲。鶯盟燕約逐東流。不似天涯短。一色柳烟弄晚。誤高樓。斜陽望眼。狂風驟起。無數殘紅。向人撩亂。

入聲甘州

際長空。草色漸如烟。社燕又雙歸。正柳雲婀娜。梨雲明媚。江水初肥。陰雨逡巡不下。也解惜芬菲。惹起閒情緒。蛺蝶飛飛。客裏堂深晝永。歎采蘭挑筍。事事都非。奈暖風遲日。如此好春時。想幽閨。垂簾人靜。更

近來、瘦損不勝衣。盡日在、闌干深處。吟對薔薇。

齊天樂 蟋蟀

是誰細把秋聲作。杉齋閑聞蛩語。冷露無聲。明星欲滴。最是心憐伊處。碎啼絮訴。恰相和、縷車。夜深鳴杼。憔悴休文。年來獨自亂離緒。半閒堂上往事。歎而今贏得。瘦腰如許。敗甃堆中。破垣縫處。切切淒淒無數。沈吟容與。想擁髻無言。銀釭繡女。聒耳愁聲。綠窗應更苦。

楊揆

字荔裳，江蘇金匱人。乾隆四十五年召試舉人，官至四川布政使，有瓔珞香龜詞一卷。

探春 詠迎春花

香卸梅梢。豔遲桃萼。蓉城催下飛檄。淡白宵勻。嫩黃朝點。夢醒宮羅試揭。耐得餘寒峭。性不共、唐花爭熱。是誰暗數春期。小窗纖指偷捻。爲怯新妝曉薄。還翦就金縷。新衣重疊。挑菜人來。踏莎期近。管領東風消息。可奈香叢裏。飛不到、尋芳胡蝶。掩映幽姿。疏簾剛逗初月。

言城路 鈴聲

丁東虬箭聲初咽。淒涼更聞鈴語。替月星寒。護霜雲重。愁夢不離煙樹。雙輪暫駐。似爲我忽忽。商量去住。縱刻閒情。也應流淚滿衫苧。春江曾艤蘭棹。記相風竿上。徹夜疏雨。一種郎當。千回替戾。零落唐宮遺譜。曉鴉啼處。總不是當年。護花庭宇。獨自消魂。倚鞭吟斷句。

趙懷玉

字億孫，號味辛，江蘇武進人。乾隆四十五年召試舉人，授內閣中書，官山東登州府知府，有亦有生齋詞五卷，一名荃提室詞。

浪淘沙

茶熟酒微溫。消盡黃昏。看燈情異去年人。只有半牀殘月到。許客平分。寂寞杜司勳。傷別傷春。自來好夢不曾真。依約畫簾風過處。昨夜星辰。

蝶戀花

艤舟亭送春

聽倦西窗連夜雨。曉夢如雲。零落渾無主。小鳥聲聲啼不住。綠陰池館深如許。已是春情無著處。凝望園亭。更遣新愁補。獨自憑闌誰共語。斜陽流水東西去。

金

燾

字保和，江蘇嘉定人。乾隆四十五年舉人，有竹莊詞草。

滿江紅

題嚴子陵釣臺

七里灘聲。訴不盡、隱流心跡。看千載、龍飛螭蟄。詎由人力。天子竟符文叔識。公卿贈與君房策。任逍遙、獨擁舊羊裘。荒磯石。隨舉足。星辰逼。隨舉目。烟霞癖。歎如此山川。惟餘空碧。遠樹曾牽春渚夢。孤篷又聽寒江雪。剩隔林、漁火一痕明。真清絕。

張槎

字猶渠、號香賓、江蘇丹陽人、乾隆四十五年舉人、官江西新淦縣知縣、有差木軒倚聲初稿、

拜星月慢

謝雨香枉和六醜詞韻、並呈香嚴、

密樹顰烟。嬌鶯啼夢。暗送春歸如箭。楚客飄零。蕩情愁緒。鎮凝竚。一縷。騷魂靜遠。窗隙。秀句時拈瑤翰。翦碧裁紅。總憐香心眼。更何堪。冷落燕臺畔。恨歌永、聽徹銅壺歎。取次老了相如。把吟情都嬾。想瓊簾、醉弄扁舟晚。詞仙去、幾度梅花怨。算何日、酹酒垂虹。泝烟波清遠。

浣溪紗

別恨

懊恨垂楊古渡頭。雁行西去水東流。最無情是木蘭舟。縱有飛花縈短棹。那堪燈火憶重樓。月殘風曉正牽愁。

程瑜

字去瑕、號少海、浙江仁和人、乾隆四十五年舉人、官義烏縣教諭、有小紅樓詞、

鷓鴣天

啼老芳園樹樹鶯。新煙迷綠過清明。風消絮雪春無影。雨碎梨雲夢有聲。人悄悄。晝冥冥。丙丁帖子寫初成。單衣小扇茶蘼徑。笑問姮娥索晚晴。

朱文治

字少仙，號詩南，浙江餘姚人。官海寧州學正，有繞竹山房詩餘一卷。

金縷曲 秋草

芳草天涯淨。想生來、情根安貼。不同飄梗。說道王孫歸路遠。怨沒寒沙千頃。休再羨、疾風知勁。煙外夕陽山外寺。望前途、只有詩僧影。誰更問、三三徑。風光此際浮難定。早池塘、春前佳夢。一時都醒。指點踏青歌舞地。到眼將心冰冷。可尙有、紫騮馳騁。南浦江郎回首碧。把離魂、消得真徵倖。憔悴色。今番領。

滿江紅 秋柳

盼我歸帆。費多少、青青青眼。都只仗、鶯啼未老。黛痕猶淺。張緒自憐風韻好。小蠻妬殺腰肢軟。奈西風、一夜送秋來。柔腸斷。朝雨曲。辭金縷。珠絡鼓。停歌版。早斜陽十里。不分濃淡。亂影宛同黃竹瘦。長條賸與青驄縮。想樓頭、更不比當初。簾休捲。

曾燠

字庶蕃，號賓谷，江西南城人。乾隆四十六年進士，改庶吉士，官至貴州巡撫。

揚州慢 題汪對琴松溪漁唱卷

鏡影澄空。波光蕩碧。春風過了還晴。恰溪邊小築。見山色松明。一自漁歌歇後。鳴榔極浦。冷月無聲。憶年來黃海。雲深幾誤歸程。邗江風雨。看寓公、載酒頻經。有白石新詞。碧山舊句。自炙銀笙。老去風懷未減。

微吟倦，十里春城。記虹橋佳話。待君重諧鷗盟。

方維甸

字南耦，號葆巖，安徽桐城人。乾隆四十六年進士，官至閩浙總督，謚勤襄，有勤襄公遺稿，附詞一卷。

蝶戀花

林下蛩螢鳴唧唧。百軋千梭。恍聽當窗織。落葉無聲風漸息。書帷燈暗爐烟直。著露秋花寒弄色。淺碧深紅。恍近妝臺側。客裏閒情消不得。冷吟殘醉空相憶。
多謝山靈留客住。斷嶺迴峯。不放征車去。嵐影弄晴眉黛嫵。西風又送黃昏雨。小閣濃香銷蕙炷。夢醒宵寒。遽訝秋如許。想倚銀屏聽漏鼓。屏間不畫遼西路。

聲聲慢 癸卯八月廿九日晚直，禁門未闌，官燭將灰，偶憶蔡伯堅涼隱寄內詞，倚聲疊和，不自知言之長也。

悲笳霜警。翠帳雲屯。輕寒釀成秋色。銀箭頻傳。坐守短更遙夕。離愁便云經慣。歎閒身、那堪名役。芳緘寄。送雙鴻錦翼。倩他風力。千里遼西征路。怕夢遠難尋。塞山殘月。鈿尺裁衣。薰透麝煤安息。宵深剪刀嫌冷。況空庭、露寒砧石。知睡未。照孤帷、燈影暈碧。

舊詞新恨。險韻微吟。幾回研殘箋色。誰約愁來。萬緒併將今夕。風塵自尋羈絆。累閨中、憶人行役。瑤琴怨。訴冰絃素指。聲聲無力。佳節恩恩過也。負九日黃花。中秋明月。試數歸期。春漏南枝消息。幽姿畫屏相